

Tajuk : UiTM, UTeM bersemuka hari ini rebut emas futsal MASUM 2012



RAI BERSAMA: Pemain-pemain UTeM meraikan gol kedua di Kompleks Sukan Unimas semalam.

UiTM, UTeM bersemuka hari ini rebut emas futsal MASUM 2012

Oleh Harry Ilias

KUCHING: Pasukan futsal lelaki Universiti Teknikal Malaysia Melaka (UTeM) menempah tiket perlawanan akhir futsal lelaki MASUM 2012 menentang Universiti Teknologi Mara (UiTM) setelah mengenyepikan cabaran pasukan Universiti Pendidikan Sultan Idris (UPSI) 2-1 dalam perlawanan yang agak tegang di Kompleks Sukan Unimas di Kota Samarahan, semalam.

Ketinggalan 0-1 pada separuh masa pertama tidak melemahkan semangat UTeM untuk bangkit dan berjaya menjaringkan dua gol pada separuh masa kedua hasil jaringan Hadis Husin dan Abdullah Abd Jalil.

Jurulatih UTeM, Md Noor Md Derus memuji semangat kental yang ditunjukkan oleh anak-anak buahnya walaupun ketinggalan pada separuh masa pertama.

Beliau berkata anak-anak buah bermain dengan baik dan mengikut strategi yang telah dirancang sungguhpun berdepan dengan corak permainan keras UPSI.

Mengenai pertemuan akhir dengan UiTM pada hari ini (Jumaat), beliau berkata pasukannya akan menyediakan 'resipi istimewa' untuk menumbangkan pasukan pilihan itu.

"UiTM adalah sebuah pasukan yang kuat. Kami pernah tewas 8-0 di tangan mereka pada saingan peringkat kumpulan. Namun ia tidak

akan melemahkan semangat kami dan anak-anak buah saya akan bermain bermati-matian untuk memburu emas," tambahnya lagi.

Terdahulu, pasukan pilihan UiTM membelasah pasukan Universiti Teknologi Malaysia (UTM) 6-0.

Sementara itu, dalam kategori wanita, UiTM turut mengesahkan tempat ke perlawanan akhir setelah membenam pasukan Universiti Islam Antarabangsa Malaysia (UIAM) 3-0. Lawan mereka ialah Universiti Malaya yang menumpaskan Universiti Kebangsaan Malaysia (UKM) juga dengan 3-0.

Sementara itu dalam acara catur, UiTM menggondol emas bagi kedua-dua kategori yang dipertandingkan.